

# „არჩევნების შემდეგ პურის გაძვირება გარდაუვალია“

## „გიფენის პარადოქსი“ და პარადოქსების ქვეყანა

გაზეთი “ყველა სიახლე” – 5-11 სექტემბერი, № 36, 2012.

საინფორმაციო საშუალებებით გავრცელებულმა ცნობამ, რომ არჩევნების დასრულებისთანავე პური სავარაუდოდ, 10 თეთრით გაძვირდება, ჩვენი საზოგადოების დიდი ნაწილი შეაშფოთა. ხომ არ მოჰყვება ამას არსებობისათვის აუცილებელი სხვა პროდუქტების გაძვირებაც? – ამ კითხვით ეკონომიკის მეცნიერებათა დოქტორ, პროფესორ ლადო პაპავას მივმართეთ:

– დავიწყოთ იმით, რომ სურსათის გაძვირება სულაც არ არის ახალი მოვლენა, ეს პროცესი უკვე რამდენიმე წელია მიმდინარეობს მთელ მსოფლიოში. ამ მოვლენას ეკონომისტებმა სახელიც მოუგონეს – აგფლაცია და მის შესახებ თქვენს გაზეთში ადრეც მითქვამს. აგფლაციას ძალიან ბევრი მიზეზი აქვს: დედამიწაზე მიმდინარე კლიმატური ცვლილებები, წყალდიდობები, გვალვები, მიწისძვრები და სხვა ანომალიური მოვლენები, რომელთა გამოც ყველაზე მეტად სოფლის მეურნეობა ზარალდება. ამ მიზეზებს დაემატა ისიც, რომ ახალი ტექნოლოგიების წყალობით ზოგიერთი სახეობის კვების პროდუქტს ენერგეტიკული დანიშნულებითაც იყენებენ, რამაც კიდევ უფრო გაზარდა მოთხოვნა ამ პროდუქტებზე. ეს განსაკუთრებით ეხება შაქარს. რაც შეეხება ხორბალს, მის ფასზე აისახება ბუნებრივი კატაკლიზმები და ისიც, რომ მოსახლეობის რაოდენობა იზრდება, ანუ კვების პროდუქტების მომხმარებელთა რიცხვი იზრდება, ხოლო მათი მიწოდება მცირდება, შესაბამისად იზრდება ფასები მათზე. ეს არის ფასების ზრდის გამომწვევი ძირითადი მიზეზები მთელ მსოფლიოში. საქართველოში პურის გაძვირება უფრო ადრეც იყო მოსალოდნელი. ამგვარ პროგნოზს აკეთებდა ძალიან ბევრი სპეციალისტი, მაგრამ გაძვირება ოქტომბრის არჩევნებმა “შეაფერხა”.

– ბატონო ლადო, მეწარმეები პირად საუბრებში ამბობენ, რომ მათ უნდათ პურის ფასი გაზარდონ, მაგრამ „ზემოდან“ უშლიან.

– გეთანხმებით. სხვათა შორის, პურის მწარმოებლები ამტკიცებენ, რომ მათ ჯერ კიდევ აქვთ ხორბლისა და ფქვილის ძველი მარაგი და შეუძლიათ პური არ გააძვირონ, მაგრამ ეს მხოლოდ სიტყვებია: ძველი მარაგებიდან რომ ფულს

ამოიღებ, ის თანხა ხომ აღარ გეყოფა გაძვირებული ხორბლის შესაძენად? ანუ, თუ მსოფლიო ბაზარზე პურის ფასი იზრდება და შენ იაფად გაქვს ნაყიდი, ეს სულაც არ ნიშნავს, რომ შენ არ გაზრდი პურის ფასს. უნდა გაზარდო, ეკონომიკა ამას გეკარნახობს და სხვა გზა არა გაქვს. სწორედ ამიტომ უნდათ, რომ გააძვირონ, მაგრამ ამას ვერ აკეთებენ იმიტომ, რომ ხელისუფლება ბიზნესს ტრადიციისამებრ, უმძიმესი წნეხის ქვეშ ამყოფებს. წარმოიდგინეთ, არჩევნების წინ პური რომ გაძვირდეს, ეს ამ ხელისუფლებისათვის რამხელა მინუსი იქნება. სხვათა შორის, ეს არის ერთ-ერთი მიზეზი იმისა, თუ რატომ დაინიშნა საპარლამენტო არჩევნები ოქტომბრის დასაწყისში და არა შუა რიცხვებში, ან თვის ბოლოს. მიზეზი მარტივია: პურის მარაგი უსასრულო არ არის, ან პურის მწარმოებლები გააძვირებენ თავიანთ პროდუქტს, ან მისი მიწოდება შეფერხდება. შეგახსენებთ, რომ ბიზნესი ვერ იმუშავებს „თხა ვიყიდე – თხა გავყიდეს“ პრინციპით, ბიზნესმა მოგება უნდა ნახოს! ამიტომ, ხელისუფლების სურვილია რაც შეიძლება მალე „გადააგოროს“ ეს არჩევნები ისე, რომ ხალხი არ გაანაწყენოს. აუცილებლად უნდა შევეხოთ ქვეყნის შიგა რესურსებსაც, სადაც ოფიციალური სტატისტიკის მიხედვითაც კატასტროფული ვითარებაა: 2011 წელს 2003 წელთან შედარებით თითქმის სამჯერ არის შემცირებული მარცვლეულის ნათესები, ანუ, ის რესურსიც კი, რაც ჩვენს ქვეყანას გააჩნია, სრულად არ არის გამოყენებული. როცა საშუალება გაქვს, რომ თითქმის სამჯერ მეტი მოსავალი მოიწიო და ამას არ აკეთებ, ეს ნიშნავს, რომ კიდევ უფრო ამწვავებ ისედაც მწვავე პრობლემას.

**– რით შეიძლება აიხსნას ეს?**

– ამის მიზეზი არის არაპროფესიონალიზმი, რომელიც ჩამოყალიბდა და ტრადიციად იქცა არა მარტო სოფლის მეურნეობის დარგში, არამედ მთლიანად, საქართველოს ეკონომიკაში. უნდა გაგახსენოთ შემთხვევითი ხალხი, რომელიც ისეთ პარადოქსულ, სასაცილო თემებზე მსჯელობდა, როგორც ბაყაყების ექსპორტი თუ ნიანგების მოშენებაა, გავიხსენოთ ის ზიანი, რომელიც საქართველოს მიაყენა ჰიბრიდული სიმინდის გაპიარებულმა პროგრამამ, რატომღაც ამ პროგრამას დღეს აღარც კი ახსენებენ. უნდა გავითვალისწინოთ კიდევ ერთი ფაქტორი – სტიქია, რომელიც თავს დაატყდა კახეთს და საქართველოს სხვა რეგიონებს და მოსავლის დიდი ნაწილი გაანადგურა. ამიტომ, არ უნდა გაგვიკვირდეს, რომ პროდუქციის მიწოდება შემცირდება, რაც თავისთავად გამოიწვევს ფასების ზრდას. ხელისუფლება ხშირად ლაპარაკობს ივანიშვილის მიერ დაქირავებულ ლობისტურ კომპანიებზე, მაგრამ თვითონაც ხომ ქირაობს? ივანიშვილი საამისო თანხას საკუთარი ჯიბიდან იღებს, ხელისუფლება კი ქვეყნის

ბიუჯეტიდან. ამიტომ, არ უნდა გაგვიკვირდეს, რომ გამარჯვების შემთხვევაში ისინი დახარჯულ თანხას მოსახლეობის ჯიბიდან ამოიღებენ და პირველადი მოხმარების საგნებს გააძვირებენ. ამ ვითარებაში რა თქმა უნდა, პურის გაძვირებაც არ უნდა გაგვიკვირდეს, თუმცა ხელისუფლება შეეცდება ეს მსოფლიო ფასების ზრდითა თუ პოლიტიკური სირთულეებით ახსნას და საბოლოოდ ოპოზიციას, გადააბრალოს. ნებისმიერ შემთხვევაში პურის გაძვირება გარდაუვალია. ჯერ უნდა ვიგულისხმოთ ათი თეთრი, დანარჩენს კი მომავალი გვიჩვენებს. თუმცა, გაძვირება სულაც არ ნიშნავს, რომ ქვეყანაში პურის მოხმარება შემცირდება.

**– რატომ?**

– ახლავე აგისხნით. ეკონომიკაში ცნობილია ასეთი ფენომენი – „გიფენის პარადოქსი“, რომელიც განსაკუთრებით მოქმედებს იმ ქვეყნებში, სადაც სიღარიბის დონე მაღალია. მოსახლეობა ირჩევს კვების ძირითად პროდუქტს, რომელიც ერთდროულად ყუათიანი და იაფი უნდა იყოს. მისი გაძვირება ამ პროდუქტის რეალიზაციის შემცირებას არ იწვევს, ანუ, ფასი რომ იზრდება, მისი მოხმარება კი არ მცირდება, არამედ პირიქით, იზრდება. საქართველოში ასეთი პროდუქტი არის პური, როგორც უნდა გაძვირდეს ქვეყანაში პური, მას მაინც იყიდიან. გიფენის პარადოქსის მიხედვით, თუ ადამიანებს ადრე გადადებული ჰქონდათ თანხა სხვა პროდუქტებისთვისაც, გაძვირების შემდეგ მათ ეს თანხა აღარ დარჩებათ, რადგან მასაც პურზე დახარჯავენ. ასე, რომ პურის გაძვირების შემთხვევაში მოსახლეობა უფრო მეტ პურს მოიხმარს. საქართველო ხომ ისედაც პარადოქსების ქვეყანაა და ეს არის კიდევ ერთი პარადოქსი, რომელიც შესანიშნავად მოვირგეთ. კიდევ ერთ პარადოქსზე მინდა მოგითხროთ: როდესაც ქვეყნის პრემიერ-მინისტრი მერაბიშვილი შეხვდა ჩვენს მეცნიერებს, რომლებიც სოფლის მეურნეობის დარგში მოღვაწეობენ, ეს გონივრული ნაბიჯი იყო, რადგან ჩვენ ამ სფეროში ძალიან დიდი პოტენციალი გვაქვს და მისი გამოყენება აუცილებელია, მაგრამ როდესაც შემდეგ გავიგე, რომ აკადემიკოსები უნდა იყვნენ სოფლებში და გლეხებს დაეხმარონ, ამაზე ბრიყვული გადაწყვეტილება არსად, არასოდეს გამიგონია. საამისოდ არსებობს აგრონომის ინსტიტუტი, რომელიც ნაციონალურმა ხელისუფლებამ მოსპო და რომელიც ყველა სოფელს უნდა ჰქონდეს, მეცნიერები კი უნდა მუშაობდნენ პრობლემებზე, ახალ მიმართულებებზე.

**– რაც შეეხება საწვავს, ბევრჯერ თქმულა და დაწერილა, რომ ეს ბიზნესი მონოპოლიზებულია. ეთანხმებით მოსაზრებას, რომ საქართველოში საწვავსაც პურის მსგავსად, პოლიტიკური ფასი აქვს?**

– რასაკვირველია, რადგან ეს სფერო მთლიანად არის მონოპოლიზებული და მას ხელისუფლების უმაღლესი თანამდებობის პირები და მათი ნათესავები აკონტროლებენ. ჩვენ კარგად ვიცით, რა კონტრაქტები აქვთ დადებული ნავთობპროდუქტებით მოვაჭრე კომპანიებს თავდაცვის სამინისტროსთან, შინაგან საქმეთა სამინისტროსთან და სხვა უწყებებთან. მათ სახელმწიფოსაგან აქვთ მიღებული სერიოზული გარანტიები, სახელმწიფო კი მათ საქმიანობაზე თვალს ხუჭავს. საბუთი გინდათ? – ერთ მაგალითს მოვიყვან: ერთ მშენიერ დღეს სააკაშვილს მოუნდა თავისი რეიტინგი აემადლებინა და იკითხა: რატომ არის ქვეყანაში ნავთობპროდუქტები ასე ძვირი? მეორე დღეს ყველა კომპანიამ გააიფარა საწვავი 5 თეთრით, მაგრამ გავიდა დრო და ყველამ 15 თეთრით გააძვირა. ასე რომ, ამ კითხვაზე პასუხი მარტივია: ქვეყნის ეკონომიკა მონოპოლიზებულია, ამიტომ ნუ გაგვიკვირდება თუ პურიც გაძვირდება, საწვავიც და ბევრი სხვა რამ, რაც აუცილებელია ჩვენი ყოფისათვის. მათ შორის, მედიკამენტებიც. ისინი როგორც უნდა გაძვირდეს, თუ ადამიანი ავად არის, თავს ხომ ვერ მოიკლავს? წამალი უნდა იყიდოს. ეკონომიკის ზემოთ ჩამოთვლილი სეგმენტების გარდა რაიმე მუშაობს საქართველოში? – არა, და რაც მუშაობს, ისიც მონოპოლიზებული და შეკრულია ხელისუფლებასთან. ამიტომ, ჩვენთვის რა მნიშვნელობა აქვს, ვინ აკონტროლებს საწვავის ბიზნესს, სააკაშვილის ძმა თუ მისი ბიძა, მთავარია, რომ ეს ბიზნესი მონოპოლიზებულია. უკვე გითხარით, რომ პარადოქსების ქვეყანაში ვცხოვრობთ – ის, რომ დავით კეხერაშვილი სახელმწიფოში სერიოზული ფუნქციების მატარებელია, ისეთივე პარადოქსია, როგორც დავით ბეჟუაშვილის, ან არჩილ გეგენავას პარლამენტარობა. გსმენიათ ოდესმე მათი ხმა საქართველოს პარლამენტში? ოდესმე რაიმე ინიციატივით გამოსულან? როდესაც ხაზს უსვამენ ვერა ქობალიას გაუნათლებლობას, ჩნდება კითხვა, რით სჯობდნენ მას მისი წინამორბედი მინისტრები? თითქმის ყველა გაუგებრობა იყო და არც ერთი მათგანი უკეთესი არ ყოფილა, ვიდრე დღეს ვერა ქობალიაა. თუმცა, სულ სხვა შემთხვევა იყო კახა ბენდუქიძე რომელიც განათლებული კაცი გახლავთ, მაგრამ მაინც უამრავი ბოროტება მოუტანა ქვეყანას.

– დაუშვავთ, მომავალ არჩევნებში „ქართულმა ოცნებამ“ გაიმარჯვა. ივანიშვილი ამბობს, რომ მან არ იცის რა დახვდება ქვეყნის ბიუჯეტში და გათვლებს საკუთარ სახსრებზე აკეთებს. როგორ ფიქრობთ, მოახერხებს ახალი ხელისუფლება ჩვენი ეკონომიკის გამოცოცხლებას?

– ყველაფერი შეიძლება თუ გონიერი, გამოცდილი და პროფესიონალი ადამიანები მოვლენ სათავეში, ისეთი პროფესიონალები, რომლებსაც ამ

ქვეყნისათვის სიკეთე სურთ. მოხდება თუ არა საქართველოში მნიშვნელოვანი ცვლილებები, მოვა თუ არა ახალი ძალა და რამდენად ჩართავს ის პროფესიონალებს საკუთარ რიგებში, ამას ვნახავთ. ყოველ შემთხვევაში მე მაინც იმედინად ვარ განწყობილი.

ესაუბრა **ხათუნა ჩიგოგიძე**